

आकाशवाणी

खबरां विकास शर्मा कोला

1. जनता दल युनाइटेड दे नेता नितीश कुमार अज्ज 10मीं बारी बिहार दे मुखमंत्री दे तौरा पर शपथ लैडन।
2. सुप्रीम कोर्ट अज्ज संविधान दी धारा 143 दे तैहत राष्ट्रपति हुं'दे आसेआ भेजे गेदे संदर्भ पर अपनी राय देग।
3. भारत नै संयुक्त अरब अमीरात दे नागरिके लेई वीजा ऑनलाइन आहली सुविधा च विस्तार करदे होई कोचीन, कालीकट ते अहमदाबाद अंतरराष्ट्री ब्हाई अड्डे गी बी एहदे च शामिल करी लैता ऐ।
4. ब्हा दे म्यार प्रबंधन ते नियमन सरबंधी आयोग नै दिल्ली सरकार ते राष्ट्री राजधानी दिल्ली एनसीआर देआले-दोआले दिएं राज्य सरकारें गी नवंबर ते दिसंबर म्हीने दरान स्कूली खेड्ड प्रतियोगिताएं गी अगड़े पाने लेई चिट्ठी लिखी ऐ।
5. 56मां भारती अंतरराष्ट्री फिल्म महोत्सव अज्जै थमां गोवा च शुरू होने जा'रदा ऐ।
6. आस्ट्रेलियन ओपन सुपर 500 बैडमिंटन टूर्नामेंट च भारती खडारी लक्ष्य सेन ते एच.एस प्रणय कल मर्दे दे इक्कले-इक्कले मकाबले दे दुए दौर च दाखल होई गए न।

<><><><><><>

Bihar-NDA Meeting

जनता दल युनाइटेड दे नेता नितीश कुमार अज्ज 10मीं बारी बिहार दे मुखमंत्री दे तौरा पर शपथ लैडन। एह शपथ ग्रहण समारोह अज्ज साढे 11:30 बजे पटना दे ऐतिहासिक गांधी मैदान च आयोजित होग। प्रधानमंत्री नरेंद्र मोदी ते होर कई दुई मन्ने-परमन्ने दियां हस्तियां इस समारोह च शामिल होडन। कल नितीश कुमार होरें गी राष्ट्री जनतांत्रिक गठबंधन-एनडीए विधायक दल दा नेता चुनेआ गेआ। एह फैसला पटना च गठबंधन दे 5 भ्याल दले दे नमें चुने दे विधायके दी सांझी बैठक

च लैता गेआ। एहदे थमां पैहले भारती जनता पार्टी नेता सम्राट चौधरी होरें गी पार्टी विधायक दल दा नेता ते विजय सिन्हा होरें गी उप-नेता चुनेआ गेआ।

<><><><><><>

PM-SA Visit

प्रधानमंत्री नरेंद्र मोदी होर 20में जी-20 लीडरें दे शिखर सम्मेलन च हिस्सा लैने लेई 21 थमां 23 नवंबर तगर जोहानास्बर्ग दक्खन अफ्रीका दा दौरा करडन। एह वैश्विक दक्खन च आयोजित होने आहला उप्परोतली चौथा जी-20 शिखर सम्मेलन होग। विदेश मंत्रालय नै इक बयान च आखेआ जे शिखर सम्मेलन च प्रधानमंत्री जी-20 एजेंडे पर भारत दा दृष्टिकोण पेश करडन। प्रधानमंत्री हुंदे आसेआ शिखर सम्मेलन दे त्रौणें स्तरें च बोलने दी मेद ऐ। जी-20 लीडरें दे शिखर सम्मेलन थमां बक्ख-बाहरें श्री मोदी जोहानास्बर्ग च मौजूद केई लीडरें कन्नै दपक्खियां बैठकां बी करडन। ओह दक्खन अफ्रीका आसेआ आयोजित भारत-ब्राजील-दक्खन अफ्रीका नेताएं दी बैठक च बी हिस्सा लैडन।

<><><><><><>

SC-Opinion Prez. Ref.

सुप्रीम कोर्ट अज्ज संविधान दी धारा 143 दे तैहत राष्ट्रपति हुंदे आसेआ भेजे गेदे संदर्भ पर अपनी राय देग। एहदे च अदालत कोला इस बारै राय मंगी गई ही जे क्या संवैधानिक रूप कन्नै तैह समें सीमा नेई होने कारण राज्य विधानसभाएं आसेआ पास विधेयकें पर कार्रवाई लेई राज्यपालें पर समें-सीमा तैह कीती जाई सकदी ऐ। मुख् न्याधीश बी.आर गवई हुंदी अध्यक्षता आहली इक संवैधानिक पीठ नै 11 सितंबर गी केंद्र दी तरफा अटॉर्नी जनरल आर. वेंक्टरमणी ते सॉलीसीटर जनरल तुषार मेहता हुंदे कन्नोकन्नी तमिलनाडू, पच्छिम बंगाल, केरल, कर्नाटक, तेलंगाना, पंजाब ते हिमाचल प्रदेश सने बरोधी धड़ें दी सरकार आहले राज्यें दी तरफा 10 दिन तोड़ी मूंज जबानी दलीलां सुनने परेंत अपना फैसला सुरक्षित रक्खेआ हा।

<><><><><><>

Bhartiya-Kala Mahotsav

राष्ट्रपति द्रौपदी मुर्मू होर कल 21 नवंबर गी हैदराबाद कश बोलारम थाहर भारती कला महोत्सव दे दुए संस्करण दा रस्मी तौरा पर उद्घाटन करडन। 10एं दिनें दा एह

महोत्सव 30 तरीक तोड़ी चलग ते एहदे च पच्छमी भारत दिएं परम्पराएं गी हैदराबाद च दर्शाया जाहग। गुजरात, महाराष्ट्र, गोवा, राजस्थान राज्य ते दादरा नगर हवेली ते दमन-दीव केंद्र शासित प्रदेश च एहदे च शिरकत करडन। इस बरे दे कला महोत्सव च करीब डेढ लकख लोकें दे औने दी मेद कीती जा' रदी ऐ। अधिकारिक जानकारी मुजब एह कला महोत्सव साहित्य दे कन्नोकन्नी सामाजिक, सांस्कृतिक, दस्ताकारिएं ते क्षेत्रीय पकवानें-व्यंजनं दा मंच साबत होग जित्थै औने आहले लोकें गी रिवायती हत्थखड्डिएं, दस्तकारिएं ते क्षेत्रीय उत्पादें दी इक तफसीली श्रृंखला दा पता लग्गोग। उनें दस्सेआ जे कच्छ दी बंदनी, कोटा दियां डोरिया, साडियां, पट्टू सूत कन्नै बुने दे कपड़े, कोहलापुरी चप्पलां, पैठणिया साडियां, गोवा दियां कुम्बी साडियां आकर्षण दा केंद्र रौहडन।

<><><><><><>

Viza-UAE

भारत नै संयुक्त अरब अमीरात दे नागरिकें लेई वीजा ऑनलाइन आहली सुविधा च विस्तार करदे होई कोचीन, कालीकट ते अहमदाबाद अंतरराष्ट्री ब्हाई अड्डें गी बी एहदे च शामिल करी लैता ऐ। नमी दिल्ली, मुम्बई, कोलकाता, चेन्नई, बेंगलुरु, हैदराबाद ते कोच्ची ब्हाई अड्डें पर एह सुविधा पैहले सवां गै उपलब्ध ऐ। यू.ए.ई दे नागरिकें गी हून भारत दे 9 प्रमुख ब्हाई अड्डें पर एह सुविधा उपलब्ध होग। इस सुविधा दा फैयदा छड़े उड़यै नागरिक ठोआई सकडन जिनें पैहले बी कदें भारती ई-वीजा जा कागजी वीजा हासल कीते दा होग। इस योजना दे तैहत भारत औने आहले यू.ए.ई दे नागरिक 60 दिनें तगर भारत च रेही सकदे न ते सैलसफा, कारोबार, सम्मेलनें ते इलाज मोआलजे दे मकसद कन्नै इत्थे आई सकदे न। एह वीजा 60एं दिनें च दउं बारी औने दी खुल्ल दिंदा ऐ। उआं एह सुविधा यू.ए.ई दे उनें नागरिकें लेई नेई ऐ जिंदे माता-पिता या दादा-दादी पाकिस्तान च पैदा होए दे होन जा उत्थै दे स्थाई बाशिंदे होन।

<><><><><><>

Delhi-CAQM

ब्ला दे म्यार प्रबंधन ते नियमन सरबन्धी आयोग नै दिल्ली सरकार ते राश्ट्री राजधानी दिल्ली एनसीआर देआले-दोआले दिएं राज्य सरकारें गी नवंबर ते दिसंबर म्हीने दरान स्कूली खेड्ड प्रतियोगिताएं गी अगड़े पाने लेई चिट्ठी लिखी ऐ।

<><><><><><>

Australian-Open

सिडनी च आयोजित आस्ट्रेलियन ओपन सुपर 500 बैडमिंटन टूर्नामेंट च भारती खडारी लक्ष्य सेन ते एच.एस प्रणय कल मर्दे दे इक्कले-इक्कले मकाबले दे दुए दौर च दाखल होई गए न। पेरिस ओलंपिक्स-2024 दे सेमीफाइनलिस्ट लक्ष्य नै चीनी ताइपे दे सुली यांग गी 21-17, 21-13 कन्नै हराया जिसलै जे प्रणय रॉय नै इंडोनेशिया दे योहानेस सौत मार्सेलिनी गी 6-21, 21-12, 21-17 कन्नै हराया। तोआई, श्रीकांत नै चीनी ताइपे दे ली चिया हाओ गी 21-19, 19-21, 21-15 कन्नै हराइयै खीरी 16एं च अपनी थाहर पक्की करी लैती ऐ, जिसलै कि थारूण नै डेनमार्क दे मैग्नस जोहान सन गी इक जबरदस्त टक्कर आहले करीबी मकाबले च 21-13, 17-21, 21-19 कन्नै हराया।

<><><><><><>

ICC-Men's U-19

अंतरराष्ट्री क्रिकेट परिषद आई.सी.सी दे 19एं बरें कोला हेठली उम्मी दे मर्दे दे क्रिकेट विश्व कप-2026 दे मैचें दा कार्यक्रम जारी करी दिता गेआ ऐ। जिम्बाबे ते नामीबिया विश्व कप दी सांझे तौरा पर मेजबानी करडन। एह प्रतियोगिता 15 जनवरी 2026 कोला लेइयै 6 फरवरी 2026 तगर जारी रौहग, जेहदे च कुल 16टीमां हिस्सा लैडन ते कुल मैचें दी गिनतरी 41 होग। पैहले ध्याड़े भारत दा मकाबला अमरीका कन्नै ते जिम्बाबे दा मकाबला स्काटलैंड कन्नै होग। तजानिया, वेस्ट इंडिया खलाफ अपना पैहला-पैहला अंतरराष्ट्री मैच बी इस प्रतियोगिता च खेडग।

<><><><><><>